

արձանագրութիւնից տեղեկանում ենք, որ Տուտեորդին եղել է խաչենցի (արձ. 169), հավանաբար, իշխանական տնից, որովհետև վերոհիշյալ հիշատակարանի մեջ իրեն անվանում է «յազատ տանէ»: Օրմանյանը իր «Ազգապատումի» մեջ Տուտեորդուն համարում է Օրբելյանց տան ազգական և Զաքարի և Իվանե եղբայրների քեռորդին: Նա գրում է, որ Տուտեորդին մասնակցել է 1208 թվականին հրավիրված Լոռիի ժողովին, Զաքարի առաջարկների ամենաեռանդուն դիմադրողն է եղել և ժողովից հետո Զաքարի մարդկանց ձեռնել է նա: Նույնը կրկնել է Աճառյանն իր Անձնանունների բառարանում<sup>2</sup>:

Այստեղ Օրմանյանը և Աճառյանը պարզապես շփոթության մեջ են: Նրանք Հաղբատի Գրիգոր եպիսկոպոսին, որ, իրոք, Զաքարի և Իվանեի քեռորդին էր և, ինչպես Ստեփանոս Օրբելյանն է ասում, 46 տարի եպիսկոպոսութիւն է արել, վերջում մեռել է Արփա գյուղում և թաղվել Նորավանքում հայոց 665 և մեր 1216 թ.<sup>3</sup>, նույնացրել են Գրիգոր Տուտեորդու հետ, որ բոլորովին այլ մարդ է: Տուտեորդին Լոռիի ժողովի ժամանակ արդեն մեռած էր, այդ մասին պարզ հիշատակութիւն ունի Կիրակոս Գանձակեցին: Նա գրում է, որ Լոռիի ժողովին մասնակցել է ի թիվս այլոց, նաև Սանահնի վանահայր Հովհաննեսը: Ուրեմն, Սանահնի վանքից ոչ թե Գրիգոր Տուտեորդին է մասնակցել, այլ վանահայր Հովհաննեսը, որ Գրիգոր Տուտեորդու մահվանից հետո հաջորդել է նրան:

Իսկ Հաղբատա վանքի կողմից, ըստ Կ. Գանձակեցու, Լոռիի ժողովին մասնակցել են Դավիթ Քորայրեցին և «Գրիգորէս եպիսկոպոս Հաղբատայ»<sup>4</sup>, Վերջինս ոչ թե Տուտեորդին է, այլ, ինչպես ասացինք, միանգամայն այլ մարդ: Սա է, որ Օրբելյանների ազգական է և թաղված է Նորավանքում, իսկ Տուտեորդու գերեզմանը Սանահնում է, և նա երբեք Հաղբատի առաջնորդ չի եղել:

Գժբախտաբար կորել է այս դեպքերի նկարագրութիւնը պարունակող վանական վարդապետի պատմութիւնը: Նրա աշակերտ Գանձակեցին վկայում է, որ «Զբովանդակ իրս զբան և զգործ այսմ ժողովոյս զրեաց մեծիմաստ և առատամիտ վարդապետն Վանական յիւրում պատմութեանն, զի ականատես էր նա իրացն եղելոց և ականշալուր, յաշակերտի կարգի գոլով յայնժամ առ մեծ վարդապետին (Մխիթարայ Գոշի)»<sup>5</sup>:

Սակայն, Գրիգոր Տուտեորդին դեռևս իր երիտասարդութիւն տարիներին, 1154 թվականին եղել է Հովհաննավանքի միաբան: Թե երբ է նա Սանահն տեղափոխվել և ինչու, հայտնի չի, միայն կարելի է վստահ կերպով ասել, որ յոթնասունական թվականների վերջին նա արդեն Սանահնումն էր և ամիր Քրդի հետ միասին օժանդակում էր Ամենափրկիչ եկեղեցու նորոգման և ներքին ժամատան կառուցման աշխատանքներին (արձ. 12):

Ամենափրկիչ եկեղեցու նորոգման պատճառը, հավանորեն, երկրաշարժներից նրա վնասված լինելն էր: Այդ առթիվ թեև անմիջական տեղեկութիւններ մեզ չ'են հասել, բայց Սանահնի վանքից ընդամենը մի քանի կիլոմետր հեռու գտնվող Հաղբատի մասին կան թե՛ արձանագրական և թե՛ մատենագրական տեղեկութիւններ:

Հաղբատի մի արձանագրութիւնից տեղեկանում ենք, որ 1016 թվականին Հոնավորի որդի Մուկը ս. Նշան եկեղեցու կաթողիկեն նորոգել է, «որ էր անբեալ ի սաստիկ շարժումնէ»<sup>6</sup>:

Սամուել Անեցին գրում է.

«Ի ԾԶԸ (588+551=1139) թվին՝ ի ԺԷ (17) արեգ ամսոյ շարժամբ կործանեցաւ Գանձակ քաղաք... եւ եկեղեցին Հաղբատայ փլուզանի...»<sup>7</sup>:

Սամուել Անեցին և Մխիթար Այրիվանեցին վկայում են, որ Մելիք շահի լավ

<sup>1</sup> Ազգապատում, գրեց Մաղաբիա արքեպ. Օրմանյան, հատ. Ա, Կ. Պոլիս, 1912, էջ 1576:

<sup>2</sup> Հր. Աճառյան, Անձնանունների բառարան, հատ. Ա, էջ 567:

<sup>3</sup> Պատմութիւն նահանգին Սիսական, արարեալ Ստեփաննոսի Օրբելեան արքեպ. Սիւնեաց, Թիֆլ., 1910, էջ 343:

<sup>4</sup> Պատմութիւն Հայոց, արարեալ Կիրակոսի վարդապետի Գանձակեցու, Թիֆլիս, 1909, էջ 162:

<sup>5</sup> Անդ, էջ 167—168:

<sup>6</sup> Այդ արձանագրութիւնը հրատարակված է Ղրիմ., էջ 3—4, Զալ., 68, Երեց., 57, Երզ., 45, Վիվական տարեգիրք, էջ 15:

<sup>7</sup> Սամուելի Անեցու չափաբանութիւնը ի գրոց պատմագրաց, Վաղարշապատ, 1893, էջ 132: